

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- 1- अनंतनाग च आतंकवादिएं बिहार दे इक नागरिक दी गोली मारियै हत्या करी दिती।
- 2- उधमपुर पार्लिमानी चुनांस हल्के च चुनाएं लेई सब्बै तैयारियां मुकम्मल, कल 16 लकख 23 जहार मतदाता 12एं मेदवारें दी किस्मती दा फैसला करडन।
- 3- चुनांस आयोग नै लोकसभा चुनाएं दे चौथे गेड़ लेई अधिसूचना जारी कीती।
- 4 आबादी दे स्हाबें हून भारत चीन गी पिच्छें छोड़ियै पैहली थाहरें पर पुज्जी गेआ ऐ।
हुन खबरें दी तफसील कन्नै प्रोमिला जम्वाल।

<><><><><><>

Terror-Attack

कश्मीर घाटी च दक्खनी कश्मीर दे अनंतनाग जिले दे बिजबिहाड़ा इलाके दे जबलीपोरा च आतंकवादिएं गोलियां चलाइयां जेदे च इक माहनू मारेआ गेआ। ओहदी पंछान राजू शाह दे तौरा पर होई ऐ जे बिहार दा रौहने आहला ऐ। इस घटना दे मगरा तुरत पुलस नै गंभीर तौर पर जख्मीं गी उपचार लेई अस्पताल च दाखल करोआया। हालांकि गंभीर तौर पर जख्मीं होए दे इस माहनू गी बचाया नेई जाई सकेया ते उन्नै इलाज दौरान जखमें दी पीड़ नेई जरदे होई दम त्रोड़ी दिता। सुरक्षाबलें इलाके दी घेराबंदी कीती ऐ ते इस घटना गी अंजाम देने आहले दी दर पकड़ लेई व्यापक मुहिम चलाई गेदी ऐ।

<><><><><><><><>

Govt. Civilian Killed

लेफ्टिनेंट गवर्नर मनोज सिन्हा होंरें दक्खनी कश्मीर दे अनंतनाग जिले दी बिजबिहाड़ा थाहर कल होए दे आतंकी हमले दी सख्त शब्दें च निंदेया कीती ऐ। आतंकवादिएं कल संझा इत्थे बिहार दे इक नागरिक दी गोली मारियै हत्या करी दिती ही। जम्मू-कश्मीर नेशनल कांफ्रेंस दे अध्यक्ष फारूक अब्दुल्ला ते उप-प्रधान उमर अब्दुल्ला होंरें इस हादसे पर दुख ते बसोस प्रगट कीता ऐ। पीपल्स डेमोक्रेटिक पार्टी दिएं प्रधान महबूबा मुफ्ती होंरें बी अपनियां दिली संवेदना प्रगट कीतियां न।

<><><><><><><><>

1st Phase Polling

लोकसभा चुनांस दे पैहले मरहले लेई प्रचार जंदी रातीं खत्म होई गेआ ऐ। 17 राज्यें ते 4 केंद्र शासित प्रदेशें तैहत 102 हल्कें च इस मरहले तैहत मतदान होग। अरूणाचल प्रदेश, मेघालय, मिजोरम, नागालैंड, सिक्किम, अंडमान ते निकोवार टापू, लक्ष्यद्वीप, पुडुचेरी, उत्तराखंड ते तमिलनाडू दे सब्बै संसदीय हल्कें च इस मरहले तैहत मतदान होना ऐ। राजस्थान दी 12 सीटें, उत्तर प्रदेश दियां 8 सीटें, मध्य प्रदेश दिएं 6 सीटें, असम ते महाराष्ट्र दिएं 5 सीटें, बिहार दिएं 4 सीटें, पच्छिम बंगाल दिएं त्रै सीटें, मणिपुर दिएं 2 ते छत्तीसगढ़, त्रिपुरना ते जम्मू-कश्मीर दी इक-इक सीट पर बी मतदान होना ऐ। लोकसभा मतदान दे पैहले मरहले लेई इक जहार 625 मेदवार चुनांस मैदान च न। एहदे अलावा अरूणाचल प्रदेश ते सिक्किम च नमीं विधानसभा असैम्बली दे चुनांस लेई बी इक्कलै मरहले च कल मतदान होना ऐ।

<><><><><><><><>

Election-Tomorrow

लोकसभा चुनांस दे पैहले गेड़ तैहत कल उधमपुर पार्लिमानी हल्के च वोट पाए जाने न। इस हल्के लेई कुल 12 मेदवार चुनांस मैदान च न। इनें मेदवारें दे सियासी भागें दा फैसला 16 लकख 23 जहार थवां बद्द मतदाता करडन। उधमपुर पार्लिमानी हल्के च 5 जिलें, किशतवाड़, डोडा, रामबन, उधमपुर ते कठुआ दे 18 विधानसभा क्षेत्र औंदे न। इस हल्के च 16 लकख 23 जहार 195 योग्य मतदाता न। इंदे चा 8 लकख 45 जहार 283 मर्द, 7 लकख 77 जहार 899 महिलां मतदाता ते 13 थर्ड जेंडर मतदाता न। किशतवाड़ जिले च त्रै विधानसभा हल्के इंद्रवाल, किशतवाड़ ते पाडर नागसेनी न। डोडा जिले च त्रै विधानसभा हल्के जेदे च भद्रवाह, डोडा ते डोडा पच्छम शामिल ऐ। रामबन जिले च 2 विधानसभा क्षेत्र औंदे न जिंदे च रामबन ते बनिहाल शामिल ऐ। उधमपुर जिले च 4 विधानसभा क्षेत्र न जिंदे च उधमपुर पच्छम, उधमपुर पूर्व, चनैनी ते रामनगर शामिल ऐ। कठुआ जिले च 6 विधानसभा हल्के न जिंदे च बनी, बिलावर, बसोहली, जसरोट, कठुआ ते हीरानगर शामिल ऐ। मतदान प्रक्रिया गी सुचारू ढंग्गै सिर करोआने लेई चुनांस आयोग नै 2 जहार 637 मतदान केंद्र कायम कीते गेदे न। किशतवाड़ च 405 मतदान केंद्र, डोडा च 529, रामबन च 348, उधमपुर च 654 ते कठुआ जिले च 701 मतदान केंद्र कायम कीते गेदे न। चुनांस आयोग नै 3 जहार 658 बैलेट यूनिट्स, 3 जहार 570 कंट्रोल कायम कीते न। इक जहार 472 मतदान केंद्रें पर वीडियोग्राफी दी सुविधा बी हासिल होग तां जे पूरी प्रक्रिया गी पारदर्शी, आजाद ते निरपक्ख ढंग्गै कन्ने करोआया जाई सकै।

<><><><><><>

4th Phase

चौथे मरहले दे चुनाएं लेई अज्ज अधिसूचना जारी करी दिती गई ऐ। इस गेड़ तैहत 13 मई गी 9वें राज्यें ते संघ शासित प्रदेशें दिएं 96 लोकसभा सीटें पर चुनांs करोआए जाडनल। मेदवार 25 अप्रैल तगर अपने नामांकन भरी सकदे न। तोआई त्रीए चरण दे चुनाएं दे नामांकन कल सम्पन्न होई जाने न। त्रीए चरण दे चुनाएं दे नामांकन कल सम्पन्न होई जाने न। त्रीए चरण दे चुनांs 7 मई गी 10एं राज्यें ते दऊं केंद्र शासित प्रदेशें च करोआए जाडन।

<><><><><><>

J&K Smoke Free

जम्मू-कश्मीर च मतदाताएं दे तजुर्बे गी बेहतर बनाने दी दिशा च इक महत्वपूर्ण गैह् पुट्टदे होई केंद्र शासित प्रदेश दे मुख चुनांs अधिकारी होरें समूलचे जम्मू-कश्मीर दे सब्बनें निर्वाचन केंद्रें गी तम्बाक् मुक्त खेतर घोषित कीता ऐ। आकाशवाणी जम्मू दे संवाददाता नै दस्सेआ ऐ जे कश्मीर दे सेहत सेवा निदेशालय थमां हासल निर्देशें मुजब मुख चुनांs अधिकारी होरें गी मतदान केंद्रें च धुआं-मुक्त वातावरण यकीनी बनाने दी अपील कीती गई ऐ। जम्मू-कश्मीर ओकड़े पैहले राज्यें ते केंद्र शासित प्रदेशें च शामिल ऐ जित्थे इस चाल्ली दे हुक्म जारी कीते गे न। मुख चुनांs अधिकारी होरें इस सरबंथै च सब्बनें जिला चुनांs अधिकारिएं गी एह् हिदायतां जारी कीतियां न।

<><><><><><>

ते हुन बाकी दिएं खबरें कन्नै श्रुति खजूरिया।

Indian-Population

आबादी दे लिहाज कन्नै भारत दुनिया च पैहली थाहरै पर ऐ। इक अंदाजे मताबक भारत दी अबादी 144 करोड़ ऐ। संयुक्त राष्ट्र दे अबादी सरबन्धी कोष UNFPA दी इक रिपोर्ट मुजब 1 इशारिया 4-2-5 अरब अबादी दे कन्नै चीन दुई थाहरै पर ऐ। UNFPA भारत दी अबादी च बाददे गी समाजी आर्थिक स्थिति च सुधार ते देसै च मातृ-मृत्यु दर च गिरावट कन्नै जोड़दा ऐ। बरे 2011 च होई दी मरदमशुमारी मुजब भारत दी आबाद 121 करोड़ ही। संयुक्त राष्ट्र दे अंदाजे मुजब 2022 च चीन दी अबादी 2 इशारिया 4-2-6 बिलियन होई गई ही पर मगरा एहदे च गिरावट औनी शुरू होई गई। भारत दी अबादी अप्रैल 2023 दे अखीरै तगर चीन दे बरोबर होई गई ही। माहिरें भविक्खवाणी कीती ऐ जे इस सदी दे अखीरै तगर चीन दी अबादी 1 बिलियन थमां हेठ जाई सकदी ऐ, जदके भारत दी अबादी अगले किश दहाकें च बधदे रौहने दी मेद ऐ।

<><><><><><>

Samba Election

26 अप्रैल गी दुए गेड़ तैहत जम्मू पार्लिमानी हल्के लेई वोट पाए जाने न। इस सरबन्धै च सांबा जिला आस्सेआ लोड़चदे इंतजाम कीते गए न। इस बारै होर जानकारी साहड़े सांबा संवाददाता थवां।

<><><><><><>

Hideout

पुंछ जिले च पुलस, सीआरपीएफ ते सेना आस्सेआ आतंकवादिएं दी छप्पने आली थाहर दा पता लाइये उत्थुआं 2 टिफिन बरामद कीते जिंदे च आई.ई.डी लाइए रक्खेआ गेदा हा। आकाशवाणी जम्मू संवाददाता दी रिपोर्ट मुजब पुलस, राश्ट्रीय राइफल्स ते सीआरपीएफ दी 246 बटालियन नै सनाई गुरसाई आले जंगलें च सांझे तौरा पर तपाशी अभियान चलाया ते आतंकवादिएं दी छप्पने आली थाहर दा पता लाइए उसी नष्ट करी दिता। उत्थुआं सुरक्षाबलें 2 टिफिन, आई.ई.डी बरामद कीते। हर इक दा भार 3 किलोग्राम हा। सुरक्षाबलें उत्थुआं तारें दा बंडल, बैटरियां, दोआइयां ते कपड़े बी बरामद कीते। बम्ब नकारा करने आले दस्ते नै इनें आई.ई.डी गी नकारा बनाई दिता। इस सरबंथे च अजें तगर कुसै गी गिरफ्तार नेई कीता गेआ ऐ। पुलस अधिकारी नै दस्सेआ जे विस्फोटक गी मोमी लफाफें च लपेटिए रक्खेआ गेदा हा। सूह हासिल होई दी ही जे इत्थे त्रै आतंकवादी बी मजूद न। इलाकें च तपाशी अभियान जारी ऐ ते होर ब्यौरे गी बलगेआ जा रदा ऐ।

<><><><><><>

IMF-UNCTAC

अंतरराश्ट्रीय मुद्रा कोष नै विश्व आउटलुक रिपोर्ट च 2025 बरे लेई भविक्ख लेई भारत दे सकल घरेलू उत्पाद दी दर जनवरी म्हीने दे 6 अशारिया 5 प्रतिशत थमां बधाइयै 6 अशारिया 8 प्रतिशत होने दी पेशनगोई कीती ऐ। एहदा श्रेय घरेलू मंग दे हालात ते कम्म करने आहली अबादी दी बरेस बधने गी दिता गेआऐ। इस्सै चाल्ली जंदे मंगलवारें जारी कीती गेदी इस रिपोर्ट च आखेआ गेआ ऐ जे विकासशील एशिया च विकास दर 2023 च 5 अशारिया 6 प्रतिशत

थमां घटियै 2024 च 5 अशारिया 2 प्रतिशत ते 2025 च 4 अशारिया 9 प्रतिशत होने दा खदशा ऐ।

<><><><><><>

Ramnavmi

नरातें दे चलदे श्री माता वैष्णो देवी श्राइन बोर्ड आस्सेआ कीता जा रदा शत चंडी महायज्ञ सम्पन्न होई गेआ। राम नौमी दे पावन मौके पर इस यज्ञ दी पूर्ण आहूति दिती गई। इस दौरान शांति ते खुशहाली दी कामना बी कीती गई। चैत्र नरातें दे पावन मौके पर 3 लक्ख थमां मते श्रद्धालुएं श्री माता वैष्णो देवी जी दी पवित्र गुफा च मत्था टेकेया। इस दौरान माता दे मंदरै ते गुफा दे आले दोआले फुल्लें कन्नै सजाया गेदा हा। श्रद्धालुएं दी सुविधा लेई बैटरी आहलियां गड्डियां, रोप-वे ते हेलीकाप्टर सेवां बी उपलब्ध ही।

<><><><><><>

Cricket IPL

आई.पी.एल क्रिकेट च कल अहमदाबाद च खेड्ढे गेदे इक मुकाबले च दिल्ली कैपिटल्स दीटीम नै गुजरात टाइटन्स गी 6 विकटें कन्नै हराया। 90 रन्जें दे लक्ष्य दा पिच्छा करदे होई दिल्ली कैपिटल्स दी टीम नै छडे 8 ओवर ते 5 गेंदें च 6 विकटां बकाया रौहंदे इस मैच गी जिती लैता। अज्जै दा मैच पंजाब किंग्स ते मुम्बई इंडियन्स बशकार चंडीगढ़ च खेड्ढे जाग। एह मैच संझा साड्ढे 7 बजे शुरू होग।

<><><><><><>